



欽定四庫全書

集部

別集類存目六

明

16
87
126

12
130
106

百六



175
1330
106

東坡學

欽定四庫全書總目卷一百七十九

所錢文
有詢那

集部三十二

別集類存目六

滄海披沙集十三卷

江蘇巡撫
採進本

明泌水王朱瑄堦撰瑄堦號玉源瀋簡王模之七

世孫昭定王恬炳子隆慶元年襲封萬歷二十九

年卒諡康僖見明史諸王世表所著有衡漳初稟

栖雲洞集雲寶寤言葵園紀言公族論等書嘗刻

於遜學書院繼合為一編於吳中重刊之總名曰

滄海披沙集穆文熙詩話謂王詩丰神俊逸思致雅澹格調在大歷以前今觀集中若夏日東園詩月落棋聲久涼生酒興多潛龍寺訪孟誠菴詩借宿閒多咏求名靜覺非春初過涵春閣詩酒嫌蘆筍少春恨李花多等句其格調頗近四靈殊未足追蹤大歷至於文體贅牙更不出王李流派矣

芝堂遺草七卷

福建巡撫採進本

明葉朝榮撰朝榮有詩經存固已著錄是集為其子大學士向高所刊凡詩一卷雜文六卷其名芝

堂者朝榮判江州時六口靈芝產於所作仕學軒前改軒曰瑞芝堂自為之記因以名集朝榮詩格文格竝明白坦易大抵偶然涉筆非刻意欲成一家者也

四遊彙六卷

浙江巡撫採進本

明趙志臯撰志臯有內閣奏疏彙已著錄是集前二卷為初入翰林時作第三卷為官南京時作第四卷為使楚時作第五卷為客粵時作題曰四遊蓋取於此第六卷乃還山以後之作亦併附焉

朱秉器集八卷

浙江汪汝璩家藏本

明朱孟震撰孟震有河上楮談已著錄此集文四卷詩四卷為張九一所選錄文不出當時習尚詩則音節諧暢而意境不深

穀城山館文集四十二卷

山東巡撫採進本

明于慎行撰慎行有讀史漫錄已著錄此集乃所作雜文也明中葉以後文格日卑學淺者蹈故守常才高者破律壞度慎行之文雖不涉弔詭之習至於精心結構灑氣流行終未能與唐順之王慎

中歸有光等竝據壇坫故錄其詩集而文集則附存目焉

龐眉生集十六卷

山東巡撫採進本

明于慎思撰慎思字無妄號航隱東阿人于慎行之弟也是集詩七卷雜文八卷樂府一卷皆有縱橫排奐之氣而頗涉粗豪

程幼博集六卷

浙江孫仰曾家藏本

明程大約撰大約字幼博休甯人是集為于慎行所選凡雜文二卷詩四卷多暢所欲言不拘格律

如泛駕之馬不可以羈勒範之前有焦竑序引孔子辭達之說謂巷伯之譏刺巧言之怨悻何人斯之迫切自後世論之豈不傷溫柔敦厚之體而聖人乃錄之於經以爲與辭達之旨有合又稱其骯髒之姿不爲世俗所約結持論侃侃脂韋突梯之人多所不悅而亦爲慷慨好義者之所深與則大約固賦性剛毅直情而徑行者宜發於文章亦肖其爲人也

雲東拾草十四卷附錄一卷

浙江孫仰曾家藏本

明韓世能撰世能字存良長洲人隆慶戊辰進士官至南京禮部侍郎召入兼翰林學士事蹟附見明史黃鳳翔傳世能以鑒藏書畫名一時張丑所爲輯南陽書畫表也史稱其教習庶吉士館閣文字是科爲盛考董其昌洛神賦十三行跋稱館師韓宗伯則當爲萬歷己丑科據明史文苑傳所載焦竑黃輝諸人固較他科爲稍勝然世能詩文則不出王李門徑是集爲所自編沒後二十年其子逢祐乃刊行附以誥敕諭祭葬文及碑銘傳狀

玉恩堂集九卷附錄一卷

浙江孫仰曾家藏本

明林景暘撰景暘字紹熙華亭人隆慶戊辰進士官至南京太僕寺卿是集爲其子有麟所編凡奏議二卷參詞二卷詩二卷文三卷附錄碑誌行狀一卷王錫爵張以誠二序及張孟男所撰碑申時行所撰墓誌皆不稱其文章惟杜士全序及王圻所作行狀稍稱之云

醒後集五卷續集一卷附京省次五卷

福建巡撫採進本

明盧維禎撰維禎字瑞峯號水竹居士漳浦人隆

慶戊辰進士官至戶部侍郎是集爲維禎致仕以後所自刊題曰醒後言如夢之醒也其集以奏疏公移評駁與詩文雜著共爲一編蓋維禎留心吏事故案牘亦一一錄存末附京省次一冊中分地望次府州縣次財賦次會狀次甲科卿輔次蓋亦手錄成編以備紀事但刊入文集則濫矣

朱文懿文集十二卷

浙江巡撫採進本

明朱賡撰賡字少欽浙江山陰人隆慶戊辰進士官至文華殿大學士事蹟具明史本傳萬歷二十

九年大學士趙志臯罷神宗慮朝臣植黨乃起賡入閣後沈一貫沈鯉竝罷賡遂獨相七年史稱其醇謹無過然無所建白惟是時東林聲氣傾動一時賡獨借漢唐宋朋黨之害以立論謂漢之黨皆君子而罹小人之害其勢在小人故使卓操之徒得以假手而國移於強臣唐之黨君子小人互相攻擊其勢兩盛而卒兩敗故使朱全忠得以竊入而國移於盜賊宋之黨皆以德行文章標表一時其勢在君子而芟除太過不能使其身安於朝廷

之上故使呂蔡諸人得以藉口而國移於隣敵黨愈衆則害愈深變愈大其言切中時病厥後明社旣屋乃信賡言其深識早見有非顧葉諸人所及者其文則未能自成一家其人蓋本不以詞章名也

王文端集十四卷

山西巡撫採進本

明王家屏撰家屏有王文端奏疏已著錄據明史藝文志其集凡二十卷千頃堂書目作復宿山房集凡四十卷今未見傳本是集奏疏四卷詩二卷

尺牘八卷凡三種據尺牘卷首韓爌序稱家屏之子已哀彙全帙次第授梓則此其不完之本也朱彝尊明詩綜載其題長陵四駿圖古體詩四首茲集亦未載入知其散佚者多矣

溪山堂草四卷

浙江汪汝璩家藏本

明沈思孝撰思孝有秦錄已著錄是編乃其晚年之作思孝名入瑯琊四十子之列論者謂其晚交姚士粦故閒作贅牙之語然其有韻之文亦復流麗清脫特雜著喜為澀體耳

天遠樓集二十七卷

浙江孫仰曾家藏本

明徐顯卿撰顯卿字公望號檢菴長洲人隆慶戊辰進士官至吏部侍郎是集爲其嗣子元澆所編前有王穉登序曰先生卜居陽羨士大夫莫名先生文先生亦不自名文也余與先生雖同枌櫚迹若風馬牛然第聞人言先生長者遂亦長者先生未幾先生來過余每談立言之業不東向讓三卽南向讓再余竟莫名先生而僅識先生長者云云是殆有微詞矣

華禮部集八卷

浙江巡撫
探進本

明華叔陽撰叔陽字起龍無錫人隆慶戊辰進士官禮部主事年二十九卒叔陽為華察之子王世貞之壻故所作五言頗有父風七言則詞調朗暢兼涉太倉流派其以詩部文部分卷亦仿世貞四部彙式也

閒雲館集鈔六卷

兩江總督
探進本

明張位撰位有問奇集已著錄是集據于慎行原序有內外二編今本乃其從子希載所選錄故名

集鈔每篇具綴評語皆希載所為明史稱位當神宗竝封三王遽請篤修交泰早兆高禱及疏薦楊鎬依違礦稅諸事其疏彙是集皆不載蓋希載諱而刪之也又史稱位諡文莊而此集皆稱文端則未喻其故矣集刻於康熙九年而首有黎元寬序蓋明末編訂之時元寬尙在云

江岷嶽文集四卷

浙江巡撫
探進本

明江以東撰以東字貞伯全椒人隆慶戊辰進士官至江西提學副使是集為其門人謝廷諒謝廷

讚舒曰敬晏文輝同編凡詩一卷文三卷皆不出
當時風氣其第一卷目錄惟載奏疏二篇而集中
併載諸記又割二卷中序數篇附之亦編校之疎
也

鐘臺集十二卷

福建巡撫
採進本

明田一儁撰一儁字德萬大田人隆慶戊辰進士
官至禮部侍郎事蹟具明史本傳一儁褫身嚴苦
家無餘貲爲侍講時以劾張居正救吳中行有直
聲其人自正詩文則未能逮古也

大泌山房集一百三十四卷

安徽巡撫
採進本

明李維楨撰維楨有史通評釋已著錄是集詩六
卷雜文一百二十八卷而一百二十八卷之中世
家傳誌碑表行狀金石之文獨居六十卷記載之
富無逾於是然牽率之作過多不特文格卑冗竝
事實亦未可徵信明史文苑傳稱維楨爲人樂易
闊達賓客雜進其文章宏肆有才氣海內請求者
無虛日能屈曲以副所望碑版之文照耀四裔門
下士招富人大賈受取金錢代爲請乞亦應之無

倦然文多率意應酬品格不能高也朱彝尊明詩
綜亦謂本甯著作如官廚宿饌麕鹿肥麋雖牯臚
具陳鷄薨雜進無當於味今核是集知非故為詆
毀矣

劉聘君全集十二卷

江西巡撫
採進本

明劉元卿撰元卿有大象觀已著錄元卿師事耿
定向及同邑劉陽講求心學而其詩文乃多慶弔
之篇罕見闡發理道類閩中所刊林網山集考江
西通志元卿所著本有山居草還山續草諸編此

本為其門人洪雲蒸等所輯觀其體例舛雜知其
去取之失當蓋已非元卿之舊本矣

不二齋文選七卷

浙江巡撫
採進本

明張元怵撰元怵有紹興府志已著錄明史儒林
傳稱元怵少負氣節年十九聞楊繼盛死為文遙
祭之又稱其自未第時即與鄧以讚從王畿游傳
良知之學然皆勵志潛修躬行實踐以讚品端志
潔元怵亦矩矱儼然無蹈入禪寂之病與畿之恣
肆迥殊是集凡文六卷詩一卷亦無語錄粗鄙之

習但於是事非當行耳

粵草十卷蜀草七卷

江西巡撫採進本

明郭子章撰子章有蟻衣生易解已著錄其平生所作之文皆每官一地即為一集此粵草其官廣東潮州知府時作蜀草其官四川提學僉事時作也前有萬歷庚寅周應鰲序稱子章沒於廬山粵草先出越若干年蜀草乃出蓋作於諸草之前而刻則在子章身後其標題皆曰自學編則子章諸草之總名云

晉草九卷楚草十二卷家草七卷

江西巡撫採進本

明郭子章撰是集以晉草楚草家草合為一編晉草乃其由浙江參政遷山西按察使時所作在萬歷二十一年楚草乃其由山西遷湖廣布政使時所作在二十二年家草則由福建布政使入覲歸而乞休時作在二十六年也此後即接黔草矣是集鈔本譌脫甚多併佚其家草之第六卷考其總目所闕凡尺牘十八首故原目八卷今以七卷著錄焉

黔草二十一卷

浙江汪汝璫家藏本

明郭子章撰是集自爲一編乃其巡撫貴州時作
總目雖題二十一卷而第八卷分九子卷第九第
十第十一第十二第十七卷皆分二子卷卷十四
分三子卷實三十四卷不明其例至卷十四後既
曰卷又十四又曰卷又又十四尤物見也案千頃
堂書目子章所著尙有閩草十六卷留草十卷浙
草十六卷閩藩草九卷養草一卷苦草六卷傳草
二十四卷今皆未見而粵草十卷黃虞稷乃不著

錄蓋當時隨作隨刻又隨意併數種爲一帙多寡
分合初無一定故所見參差不一耳

李中丞文集二卷

江西巡撫採進本

明李涑撰涑字源甫號養愚雩都人隆慶辛未進
士官至右僉都御史巡撫應天是集爲

國朝康熙十年其里人易學實所刻大抵皆應俗之
作蓋涑本以清介著學實之刻其遺文特重其爲
人耳

文潔集四卷

江西巡撫採進本

明鄧以讚撰以讚字定宇新建人隆慶辛未進士
官至吏部侍郎諡文潔事蹟具明史儒林傳以讚
早以孝行聞晚退居西山三十年以清介為世所
重而無所著述此本乃吉水鄒元標蒐輯於斷簡
散帙之中空輿吳達可為之付梓其講學語僅存
數則餘不過奏疏三首與書序記傳諸應酬之文
耳中附詩數十首尤非所長也

方初菴集十六卷

浙江孫仰曾家藏本

明方揚撰揚字思善號初菴歙縣人隆慶辛未進

士官至杭州府知府是集第一卷為語錄二卷為
箴論三四卷為詩五卷至十六卷為雜文其語錄
箴論尚皆切實惟詩文多應酬之作末附莅官時
諸告條尤為冗雜揚本有山中燕中中州南署等
稟此集乃其門人賀燦然所合編也

陳如岡文集二卷

兩江總督採進本

明陳大科撰大科字思進號如岡南通州人隆慶
辛未進士官至右都御史兼兵部侍郎總督兩廣
大科官給事中時因歲旱上弭災六事遷太常卿

時又疏救李獻可等又劾太監馮保有直聲及總督兩廣有定安南功是集上一卷具錄當時奏疏下一卷則雜文數篇而已

賜餘堂集十四卷

內府藏本

明吳中行撰中行字子道號復菴武進人隆慶辛未進士官編修時與趙用賢等論張居正廷杖削籍後屢起屢廢卒不大顯終於侍講學士掌南京翰林院事事蹟具明史本傳是集爲其子大理寺少卿亮所編中行以鯁直稱詞章不甚著於世集

中植綱常正朝廷二疏氣節凜然又不以詞章論矣

鄒聚所文集六卷外集一卷

浙江巡撫探進本

明鄒德涵撰德涵字汝海安福人隆慶辛未進士官至河南按察司僉事明史儒林傳附見其祖守益傳末是集凡詩一卷文五卷其外集一卷則皆歷官誥敕及往來書牘也詩文多涉禪機持論亦往往偏駁史稱守益子善服習父訓踐履無怠稱其家學而德涵從耿定理游定理不答發憤湛思

自覺有得於是專以悟為宗於祖父所傳始一變

云

研山山人漫集一卷

浙江孫仰曾家藏本

明方盱撰盱字文明後棄舉子業將遊五岳取莊子逍遙遊語改名大年蘇州人居洞庭東山是集為湖州沈庭詔所編前有隆慶二年姜元序茅翁積方山人傳又列翁積詩評數條逐體分論多大言無實至詆束皙補亡穢不可讀其分五言律五言排律為二格而云排律本賦體又謂絕句裁自

近體皆漫無依據其推重盱詩以四言六言比嵇康五言比陶潛五言律比張九齡五言絕句比王維然皆所謂形骸之外去之愈遠七言古詩尤為淺薄翁積總評謂侈萬言於毫末恣百態於細縹雖有歉於豪士實無損於專門則亦知其才地之弱矣

蒼耳齋詩集十七卷

浙江孫仰曾家藏本

明方問孝撰問孝字胥成歙縣人仕履未詳歙縣志亦無其名姓集中有與汪道昆詩當是隆萬間

人其詩風華有餘深厚不足蓋亦沿七子之派多

浮聲而少切響也

交翠館集十卷

江西巡撫探進本

明萬道光撰道光字日章臨川人是集詩文皆未入格其學以金谿為宗說經諸篇皆疎於考證如或謂綱目不出朱子手道光以為無的考是不知有趙師淵也伊尹放之于桐放字為教字之誤乃沈括夢溪筆談之說道光亦未能引據

汪禹父詩集八卷

浙江孫仰曾家藏本

明汪淮撰淮字禹父休甯人隆慶閒山人也是集皆古今體詩前有陳履王世貞劉鳳汪道昆吳子玉諸人序子玉序稱令其伯子懋孝手錄成卷諗於余蓋淮所自編其詩皆依託七子之門戶故世貞等頗獎借焉

巢雲軒詩集六卷續集五卷詩餘一卷

安徽巡撫探進本

明吳宗儒撰宗儒字次魯號黃麓晚號止耕休甯人其詩工於聲律然運意不深風骨亦未成就

卓光祿集三卷

浙江汪汝璫家藏本

明卓明卿撰明卿有卓氏藻林已著錄所著有卓
澂甫詩集續集北游稟文集三山游稟諸編其子
爾康請曹子念哀合刪定編為此集其詩頗囿於
風氣未能自出新裁

卓澂甫詩續集三卷

江蘇巡撫
探進本

明卓明卿撰是集為明卿所自編刻於萬歷甲申
李維楨序稱元美兄弟左提右挈足使澂甫不朽
深有不滿之詞焉

廣讌堂集二十四卷

兩淮鹽政
探進本

明樊山王朱翊鉅撰翊鉅字匡鼎自號隱真子荆
王瞻峒六世孫萬歷庚子襲封其父載岑以文行
稱翊鉅世其家學與弟翊鏗翊鑿皆好為詩兄弟
嘗共處一樓號花萼社楚藩多強橫樊山一派其
最文雅者也是集賦及三言四言詩共一卷五七
言古今體詩共二十二卷長短句一卷大抵多近
香山之派末有道德經說奧二卷題曰朱孟嘗撰
蓋亦楚宗是以附錄與詩集為不倫今別入子部
道家類焉

梅雪軒詩彙四卷

兩淮鹽政
採進本

明朱敬鑑撰敬鑑字進父秦愨王棧八世孫萬歷中為奉國中尉詩格淺弱敷衍成篇而已

樂陶吟草三卷

浙江巡撫
採進本

明姚舜牧撰舜牧有易經疑問已著錄是集乃康熙癸丑其曾孫涪顯所刊朱彝尊靜志居詩話謂舜牧以厚德聞鄉里事難悉書詩不專工然頗自喜今觀是編皆沿白沙定山之派首載論詩二首有云試讀三百篇寫意不求工但能矢口發含蓄

自無窮其宗旨可見矣據涪顯後序所刊乃詩文全集此本有詩而無文豈佚其半耶

林初文詩選一卷

兩江總督
採進本

明林章撰章本名春元字初文福清人萬歷癸酉舉人坐事除名後上書言兵事瘐死於獄是集前有曹學佺序曰初文才士為嫉者所中所作多散佚其子哀輯為一帙梁溪九時純付梓則是集本有刊版而此乃寫本蓋傳錄於版佚之後也凡賦二首詩八十二首學佺序稱其海月賦而此本無

之蓋鈔胥又有所漏矣

鬱儀樓集五十四卷

江蘇巡撫探進本

明鄒迪光撰迪光字彥吉無錫人萬歷甲戌進士官至湖廣提學副使年四十卽罷歸築室惠山多與文士觴詠優游林下者幾三十年時王世貞已沒迪光欲代領其壇坫然竟不能也是集凡賦一卷詩二十九卷雜文二十四卷其詩文皆欲矯雕鐫翻成淺易故朱彝尊靜志居詩話深不滿焉特略取其絕句而已

石語齋集二十六卷

兩江總督探進本

明鄒迪光撰其以石語名齋蓋用庾信讀溫子昇韓陵山寺碑事亦高自位置矣案江南通志文苑傳載迪光集凡三百餘卷而不詳其名明詩綜載迪光所著有鬱儀樓集調象菴彙始青閣集不載此集明人集刻本叢雜著錄互異此亦其一也

調象菴彙四十卷

兩江總督探進本

明鄒迪光撰案涅盤經曰譬如醉象狂駮暴惡多欲殺害有調象師以大鐵鉤鉤斫其項卽時調順

惡心都盡一切衆生亦復如是貪慾瞋恚愚癡醉
故欲多造惡孽諸菩薩等以聞法鉤斲之令住更
不得起造諸惡心云云此編乃迪光之續集蓋晚
歲所作時方歸心釋氏故以調象名菴因以名集
云

快獨集十八卷

山東巡撫
採進本

明李堯民撰堯民字耕堯濟甯人萬歷甲戌進士
官至工部右侍郎是集凡詩六卷文十二卷快獨
者所居樓名也雜文中奏議一類敷陳頗爲剴切

詩則秀潤有餘而興象不足純爲七子之派故序
之者爲李維楨焉

征南草一卷

陝西巡撫
採進本

明王邦俊撰邦俊字虞卿鄜州人萬歷甲戌進士
官至貴州兵備參政是編卽貴州所作時苗民不
靖起邦俊理兵事故以征南爲名凡詩三十餘首
賦一首又母老乞致仕上兩院呈詞一首亦竝附
焉

林伯子詩草一卷

福建巡撫
採進本

明林兆珂撰兆珂有詩經多識編已著錄此集本名挈朋草其題曰林伯子者蓋其序為柯壽愷所作乃當日同社之辭也凡詩二百三十餘首其中七言律詩頗得錢劉風調集中亦惟此體最多古詩則不能入格蓋晉安一派皆從七言律詩入門也

隅園集十八卷

浙江巡撫探進本

明陳與郊撰與郊有檀弓集註已著錄隅園集皆所作雜文及詞曲其文摹仿漢魏似古色斑駁而

不出弁州四部之門徑又以其子臯坐鹽徒事陷冤獄上書武安王及縣城隍神亦載集中雖秦詛楚文古有其事編入文集頗覺不倫
里居之時與人尺牘益為小品矣與郊集總名奉常佚彙凡分四種首為隅園集次為黃門集次為蕓川集次為論癡符論癡符者語出顏氏家訓謂可笑之詩賦也今黃門集別入奏議貽癡符又有錄無書故惟以此二編著錄集部焉

去偽齋文集十卷

江蘇巡撫探進本

別集類存目六

明呂坤撰坤有四禮疑已著錄是集爲其孫慎多
等所刊坤於明季講學諸儒中最爲篤實是集亦
多有裨世道之文而出於後人之編錄一切俳諧
筆墨無不具載夫韓愈雜說僅數條耳其他寓言
惟毛穎傳石鼎聯句編入集中革華傳嘲齏睡諸
篇卽不編入李漢所以爲有識惜編是集者昧此
也至於應俗之文連牘不已益爲眼中金屑矣

來禽館集二十九卷

浙江汪汝
璫家藏本

明邢侗撰侗字子愿臨邑人萬歷甲戌進士官至

陝西行太僕卿明史文苑傳附載董其昌傳中是
集凡文二十四卷詩僅五卷侗以善書得名當時
有北邙南董之目其序于慎行詩集謂李何學唐
爲化鳩之眼而於太倉歷下竝有微詞蓋能不依
七子門戶者故所作大抵和平雅秀王士禛論詩
絕句亦有來禽夫子本神清之語特骨幹未堅不
能自成一隊文體則更近於澀矣

支子餘集五十二卷

浙江汪汝
璫家藏本

明支大綸撰大綸有世穆兩朝編年史已著錄是

編乃大綸自萬歷丙子至壬寅所撰詩賦雜文凡
藝餘十四卷政餘八卷屯餘八卷耕餘八卷斃餘
二卷述餘六卷又永陵編年史四卷昭陵編年史
二卷卽所爲世穆兩朝編年史也集內酬應之作
居多語亦閒涉荒誕觀其自題像贊及題觀音像
贊竟以孔子自居是何言歟

御龍子集七十七卷

兩江總督
採進本

明范守己撰守己有曲洧新聞已著錄是編以集
爲名實則兼收其說部故目錄每卷惟署曰御龍

子第幾首爲膚語四卷次天官舉正六卷次參兩
通極六卷次卽曲洧新聞四卷次乃爲吹劒草五
十三卷膚語皆襲宋人緒論無所發明天官舉正
則鈔撮各史天文志亦無所考正參兩通極摹仿
太元潛虛皇極經世諸書於八卦之外別爲元息
進隆中消殺沮八卦名因而乘之爲九八七十二
卦以當七十二候變彖曰繹變象辭曰勇變爻象
曰繇末爲索辭八篇以擬繫辭又出諸家僭經之
下曲洧新聞雜記時事蓋倣朱弁曲洧舊聞而於

張居正屢以謀篡書之未免恩怨之詞不足徵信
吹劔草爲所作詩文自稱不作唐以後語然刻意
摹擬斧鑿之痕不化

郢堊集十二卷

浙江孫仰曾家藏本

明范守已撰是編於宦遊所至各爲一集曰西餉
稟曰雲閒稟曰北行稟曰吳中稟詩文詞賦雜編
不分體裁王世貞爲之序語亦在抑揚之間

場居集二卷田居稟一卷河上稟一卷

直隸總督採進本

明李化龍撰化龍有平播全書已著錄其平生以

經濟著平播治河諸疏表表當代原不必以詩見
乃必欲以功業兼文章其畫蛇之足乎

少室山房續稟十五卷

浙江汪汝璫家藏本

明胡應麟撰應麟有筆叢已著錄是編凡兩都集
一卷蘭陰集一卷華陽集十卷養疴集二卷青霞
稟一卷僅止五種蓋類稟未出以前隨作隨刊之
本也

郊居遺稟十卷

安徽巡撫採進本

明沈懋學撰懋學字君典宣城人萬歷丁丑進士

第一授翰林院修撰追諡文節事蹟附見明史田
一雋傳是編詩三卷雜文七卷萬歷乙巳其兄子
有容刻於福建懋學官翰林時值張居正奪情與
吳中行趙用賢謀各上疏吳趙皆受杖去國而懋
學疏章爲人所持不果進乃貽居正子嗣修書又
與工部尙書李幼滋書以爭之今集中有擬救建
言諸臣令大學士張居正奔喪疏一篇蓋卽其時
未上之藁然非擬疏之難上疏之難也旣未上矣
存之何爲乎

快雪堂集六十四卷

浙江朱彝尊家
曝書亭藏本

明馮夢禎撰夢禎有歷代貢舉志已著錄夢禎舊
藏王羲之快雪時晴帖故以名堂後帖歸馮銓堂
名亦隨之而移實則始自夢禎也是編文六十二
卷詩止二卷所作皆喜於疏快不以鏤刻爲工而
隨意所如無復古人矩矱矣

海門先生集十二卷

浙江朱彝尊家
曝書亭藏本

明周汝登撰汝登有聖學宗傳已著錄是集凡文
十卷詩二卷集中如九解九篇越中南都剡中東

粵新安會語五篇皆聚徒講學之語其釋良知二字謂良知甚也當如至善至德至禮至樂太極太初等至字太字皆甚字之義有不可擬議不可名言之妙其立義新奇非惟孟子無此說即王守仁亦無此說斯真龍溪末派惟所欲言者矣詩亦作白沙定山之體其正唐詩一十五首尤不可解如取李白問余何事棲碧山一首翻其意而竄改之曰桃花流水依然在別有天地只人間是不幾王安石之一鳥不鳴山更幽乎

東越證學錄十六卷

安徽巡撫採進本

明周汝登撰汝登傳王畿之說故是錄以證學為名而會語亦與詩文竝列

可菴書牘十卷

兩江總督採進本

明張棟撰棟字可菴崑山人萬歷丁丑進士官至兵科都給事中是編為其邑人王煥所編以其歷任書牘分卷排纂亦王儉一官一集之例也

詹養貞集三卷

江西巡撫採進本

明詹事講撰事講字明甫別號養貞江西樂安人

萬歷丁丑進士官至北直隸提學御史其集初刻於萬歷戊戌凡文三卷詩四卷後詩集散佚僅有文集

國朝乾隆庚申其元孫道行重刊之卽此本也事講從羅洪先遊傳姚江良知之學陳獻章王守仁之宗旨所在也

片玉集四卷

江西巡撫採進本

明陳邦科撰邦科字俊卿號警亭高安人萬歷丁

丑進士官至河閒府知府是集凡閩瀛漫語一卷言責要覽一卷留臺疏藁一卷聽花軒摘藁一卷其閩瀛漫語皆設爲問答以辨析物理力闢星命輪迴之說持論甚正其謂欲端善敗之原者謹諸德握治亂之機者慎諸人尤爲切實至謂理之變者爲怪氣之變者非怪國家之盛衰本於乖和無關祥異則主持太過欲破讖緯之妄轉岐天人而二之不幾於天變不足畏乎言責要覽及留臺疏藁皆其官南京御史時所作明至萬歷以後居言

路者大率矯激攻訐以致國是紛拏迄於亂亡而未已邦科所列十一條分目爲四十三中有當緩言者三婉言者二勿輕言者七勿爲人言者五可謂曲中明季諸臣之習其疏彙如論罪謫言官救李材論西夏撫賊失策諸篇亦頗剴切惟詩筆粗厲全不入格耳敖文禎作邦科墓誌云所著尙有循良模範辨問錄二書今集中未見或選刻時所佚歟

梅谷集十八卷

浙江巡撫探進本

明莊履豐撰履豐字中熙晉江人萬歷丁丑進士改庶吉士其集前十四卷皆雜文後四卷爲詩其門人黃汝良何喬遠等所編履豐以奉兄喪歸里遭疾早卒未掌制誥而集中有冊文奏書等篇殆皆其館課之擬作耶

寶菴集八卷

江蘇周厚堦家藏本

明顧紹芳撰紹芳字實甫太倉人萬歷丁丑進士官至左春坊左贊善是編前有馮琦三太史集序一篇稱紹芳及王敬卿葛仲明之詩皆所手定則

此集爲三家之一種也朱彝尊靜志居詩話云實甫詩工於五律不露新穎矜鍊以出之頗有近於孟襄陽高蘇門者今觀其集終覺意境未深也

瑞陽阿集十卷

兩江總督採進本

明江東之撰東之字長信歙縣人萬歷丁丑進士官至右僉都御史巡撫貴州事蹟具明史本傳明別有洗馬江朝宗字曰東之或混爲一人非也東之嘗築室瑞金山中故以瑞陽阿名集其立朝頗著風節初劾馮保徐爵又劾王宗載于應昌及駙

馬都尉侯拱宸繼以爭壽宮事與李植楊可立均坐貶其詳見魏禧所爲傳中故集中奏議居半云

楊文懿集十二卷

浙江巡撫採進本

明楊起元撰起元有識仁編已著錄是集爲其孫廷春所刊據目錄作二十卷而自十一卷至十八卷皆註云嗣刻其有錄有書者僅十二卷蓋哀輯未竟之本也

松門橐八卷

浙江巡撫採進本

明王庭謨撰庭謨字敬卿華州人萬歷庚辰進士

官至翰林院修撰年未四十而歿故詩文皆未成
就馮琦序其詩稱其有沈鷺邁往之氣而文以質
掩蓋道其實云

孟雲浦集八卷年譜一卷附錄一卷

河南巡撫
採進本

明孟化鯉撰化鯉字叔龍號雲浦新安人萬歷庚
辰進士官至吏部文選司郎中持正不阿後以奏
起給事中張棟先事削籍歸事蹟具明史儒林傳
化鯉少從九時熙遊講良知之學以無欲為宗以
慎獨為本其集初刻於萬歷閒此本則康熙癸卯

其後人所重刊也據其原目卷一為尊聞錄皆所
聞於時熙之語卷二至卷五為文卷六卷七為雜
著卷八為詩首冠以年譜其門人王以悟所編附
刻諡議像贊諸作則其後人所續輯

梅園集二十卷

浙江汪汝
堯家藏本

明沈一中撰一中字長孺鄞縣人萬歷庚辰進士
官至布政使是集詩賦八卷雜文十二卷大抵欲
以才藻見長而短於剪裁澄汰

九芝集選十二卷

內府
藏本

明龍膺撰膺字君御武陵人萬歷庚辰進士官至南京太常寺卿是集皆所作詩賦乃其兄襄所選定以卷首冠以九芝賦遂以名之

姑孰集二卷

浙江巡撫採進本

明章嘉禎撰嘉禎字元禮德清人萬歷庚辰進士官至大理寺寺丞是集詩文雜編殊無體例蓋未定之藁詩筆亦清雋而多近率易其名曰姑孰以嘉禎嘗為當塗知縣故也

崇雅堂集十五卷

山東巡撫採進本

明鍾羽正撰羽正字叔濂益都人萬歷庚辰進士官至工部尚書事蹟具明史本傳是集賦詩六卷文九卷為其門人高有聞元野鶴所編羽正清介耿直為時所重故集中奏疏多切中時弊其他雜文則率爾操觚者居多詩多感激時事之作氣體尙澹然未免浴七子之末派

負苞堂藁九卷

浙江汪汝璦家藏本

明臧懋循撰懋循字晉叔長興人萬歷庚辰進士官國子監博士詩多綺羅脂粉語未免近靡靡之

響懋循善顧曲元明雜劇皆所梓行故詞曲序引
屢見集中亦其結習之所在也

農丈人文集二十卷詩集八卷

浙江巡撫
採進本

明余寅撰寅有乙未私志已著錄朱彝尊靜志居
詩話謂其自負古文然於作者尚遠其於詩自謂
涉其藩未窺其奧亦自知之矣是集乃其歸田以
後所輯考農丈人星見天官書又雲仙雜記載陶
潛聽水稱吾師農丈人事寅之命名似取陶語也

楊道行集十七卷

浙江巡撫
採進本

明楊于庭撰于庭有春秋質疑已著錄是集于庭
所自編其詩沿何李之派故擬騷擬樂府古詩不
能變化蹊徑惟五言古詩時露清挺本色尚存其
官職方時值甯夏及倭寇之亂於本兵多所贊畫
及事平而竟中察典與虞淳熙同罷歸是為萬歷
中門戶交爭之始故憤鬱不平屢形篇詠然事殊
屈子而怨甚行吟未免失之過激與風人溫厚之
旨為有閒矣

青棠詩集八卷

浙江孫仰
曾家藏本

別集類存目六

三

明董嗣成撰嗣成字伯念烏程人萬歷庚辰進士官至禮部郎中是編乃嗣成沒後其友茅維所編前有謝肇淛序稱嗣成古選憲章陶謝近體沐浴岑王如姑射仙人飡風飲瀼蓋略舉其近似至云使天假以年駸駸乎將立壇坫與海內爭雄則已顯言其學力尙淺矣

鄒孚如集

無卷數 浙江巡撫採進本

明鄒觀光撰觀光字孚如雲夢人萬歷庚辰進士官至南京兵部郎中擢太僕寺少卿未上而卒是

集皆雜文無詩前無序目版心亦不刊卷次蓋未定之本其文往往體近制藝蓋揣摩科舉先入者深觀其雲夢儒學藏書記極論明人不務博學非久歷名場不能言之如是切中也三楚文獻錄稱觀光與魏允中顧憲成以文學經濟相砥礪在吏部發諸吏增減文書拜官事抵罪者數百人一洗部弊因陳論不合乞歸養事親十餘年始補南職方郎是其生平建豎固不以詞章見長矣

來復堂集二十五卷

江西巡撫採進本

明曾維倫撰維倫字惇吾江西樂安人萬歷庚辰進士官至嘉興府同知是集前有萬歷丁亥黃洪憲序稱維倫出詩古文一編則是集原本為所自定然未及授梓歲久漸佚乾隆壬戌其六世孫廷試乃哀輯佚彙刊版即此本也維倫學出姚江與焦竑李材羅汝芳等共闡良知之旨故文集十九卷以理學見解三卷為冠詩集六卷以理學詩六十一首為冠云

玉堂遺藁

無卷數湖北巡撫採進本

明蕭良有撰良有字以占號漢冲漢陽人萬歷庚辰進士官至國子監祭酒良有在史局十五年長於當時制誥之文規模宏敞有承平臺閣之體是集為其曾孫延昭等所編分類排比不分卷數末有補遺及葉向高所撰墓誌一篇

亦為堂集四卷

江蘇巡撫採進本

明史孟麟撰孟麟字際明號玉池立與人萬歷癸未進士官至太僕寺卿崇禎初追贈禮部右侍郎事蹟具明史本傳孟麟持正不阿屢忤權倖氣節

動天下其歿也倪元璐爲作傳趙南星序其奏疏
鄒元標序其語錄其人品可以想見其集凡奏疏
一卷明道附言一卷詩草一卷文章一卷又一別
本題曰史太僕集所載亦同蓋一書而再刻也孟
麟本講東林學御史劉光復嘗斥東林又嘗糾李
三才及光復爭挺擊下獄孟麟乃疏救之東林頗
以爲疑孟麟與三才書曰論朋友則功名爲輕論
君臣則朋友之私義又輕可謂能見其大倪元璐
亦曰初趙公爲選部時先生曾未識面第以賢姦

消長繫國否泰情迫憂危勢無結舌苟容不惜再
棄官以伸公是不知者以爲爲友予謂是乃純爲
君耳何友之有然則孟麟在東林中爲超然於門
戶外矣至其文章則惟意所如無復修詞之功直
以餘事視之可也

方眾甫集十四卷

江蘇巡撫
探進本

明方應選撰應選字眾甫別號明齋華亭人萬歷
癸未進士官至盧龍兵備副使應選初牧汝州刻
有汝上詩文二集其子又增併遺藁刻爲此本其

詩古體頗清麗文筆亦尚健舉而漸染習尚未盡

脫當時風氣

葛太史集五卷

山東巡撫採進本

明葛曦撰曦字仲明號鳳池德平人萬歷癸未進士官翰林院檢討據崇禎丙子其姪如麟後序稱全集八卷此本止五卷以原目較之尚佚論朶顏衛檄擬俘獻雲南叛夷露布重修順天府學記三首而勤政勵學箴一篇又不列入目錄參差錯亂莫之詳也其詩尚沿歷下餘派少精湛之思而音

響亦自琅琅可誦較之竟陵公安以後鉤章棘句者尙有閒焉

占星堂集十五卷

浙江孫仰曾家藏本

明唐文獻撰文獻字元徵南直隸華亭人萬歷丙戌進士官至禮部右侍郎翰林院學士諡文恪事蹟具明史本傳朱彝尊靜志居詩話載文獻未第時曾見奎宿於堂上故以占星名其堂因以名集

大雲集

無卷數兩江總督採進本

明曹璜撰璜字伯玉別號元素益都人萬歷丙戌

進士官至通政司右參議是集鈔本凡十冊前無
序目亦不分卷帙前四冊爲雜文及經解奏疏禪
語然殘闕殊甚多不可讀後六冊則其官西安知
府及提學湖廣時案牘之文而西安爲最詳如社
約救荒織造開礦諸規議大抵皆委曲懇到其言
關中居天下阨塞戶口百萬乃此公私之積處之
如掃守令無一人長思舉其事者而民惟寄死生
於天河南之事奚保不再見也璜守西安在萬歷
中年其於啟禎時事曲突移薪若有先見其解經

則多影響支離至臨濟大意楞伽質義諸篇本有
涉雜學蓋明季士大夫流於禪者十之九也

中祕草三卷

湖北巡撫
採進本

明李沂撰沂字景魯嘉魚人萬歷丙戌進士官至
吏科給事中劾東廠太監張鯨廷杖削籍後贈光
祿少卿事蹟具明史本傳是集皆其爲庶吉士時
所作自記謂每月上旬中旬下旬試於翰苑者曰
館草每月朔望試於東閣者曰閣草皆詳錄當時
閣師館師評語末附載劾張鯨疏一篇及廷杖之

欽定四庫全書

別集類存目六

三

後王錫爵楊起元袁黃通問三尺牘

尊拙堂文集十二卷

浙江巡撫採進本

明丁元薦撰元薦有西山日記已著錄元薦受業顧憲成入東林黨籍當時以節行稱而文章質率不出講學家窠臼

永思齋文集六卷

直隸總督採進本

明李日茂撰日茂字文華號培吾青縣人萬歷丙戌進士官至山東按察司副使日茂官御史時有諫三王竝封疏今載集中詞頗激直而明史王錫

爵傳載當時爭封議諸臣但有趙志臯張位史孟麟羅萬化岳元聲顧允成張納陞陳泰來于孔兼李啟美曾鳳儀鍾化民項德禎李騰芳等獨不及日茂之名未詳其故至諫竝封第二疏據行狀稱撰彙未上乃亦收入集中則過矣第二三卷內多案牘之文頗為冗碎

溟池集十六卷

江蘇巡撫採進本

明張文柱撰文柱字仲立崑山人萬歷戊子舉人官臨清縣知縣是集前七卷為詩賦後九卷為雜

文每篇之下或標云見遺草見薄遊集見扇見題
壁見友人集鈔蓋其後人博蒐佚稟而成也

容臺文集九卷詩集四卷別集四卷

兩淮馬裕家藏本

明董其昌撰其昌有學科考略已著錄其昌以書
畫擅名論者比之趙孟頫然其詩文多率爾而成
不暇研鍊詞章之學蓋不及孟頫多矣

竹素堂藏稟十四卷

浙江孫仰曾家藏本

明陳所蘊撰所蘊字子有上海人萬歷己丑進士
官至南京太僕寺少卿是集凡雜文十一卷詩三

卷前有王宏誨陳文燭序俱稱其官為陳比部蓋
在郎署時所輯也詩文摹擬太甚未能杼軸予懷
詹景鳳明辨類函嘗稱所蘊文法汪伯玉幾為敵
國詩健而潔近體亦似于鱗則其宗法概可見矣

青藜館集四卷

江蘇巡撫採進本

明周如砥撰如砥字季平號礪齋即墨人萬歷己
丑進士官至國子監祭酒是集刊於崇禎壬午詩
不及一卷餘皆雜文多館課及應酬之作如太上
感應篇序之類亦備錄不遺編次殊為蕪雜前有

王思任公簡二序思任序多稱其制藝體序多稱其德量其微意可思矣

小山草十卷

浙江巡撫探進本

明郝敬撰敬有周易正解已著錄是編首為鯁生蠡管三卷首載闢佛書次則辨論經旨之文又雜著三卷尺牘一卷家乘三卷蓋其小山草堂全書之一種敬喜說經古文非所留意置之不論不議可矣

姜同節集八卷

江蘇巡撫探進本

明姜志禮撰志禮字立之丹陽人萬歷己丑進士官至尙寶司卿致仕後加太常寺少卿是集惟第五卷後半為詩餘皆雜文所載諸疏論列時事頗為切直其守泉州時清還沙格澳及辨李相國僞書事官兩廣時拒李鳳高案兩瑞及擒叛猺韋尙勝事政績多可稱官山東參政時以爭福王莊田謫官官尙寶時河南進玉璽魏忠賢欲令表獻執不可其風節亦殊可取詩文則類皆應酬之作也

劉直洲集十卷

浙江孫仰曾家藏本

欽定四庫全書總目卷一百七十九

集部 別集類存目六

明劉文卿撰文卿字後如江西廣昌人萬歷己丑進士官至南京兵部員外郎文卿性孤介嘗以忤權姦左遷其文頗有英氣惟年僅三十三而卒功候未深故風格未就集中如急選被論辭疏及海防二議台州金華二府興革條議亦可以考見時政也

吳繼疏集十二卷

江蘇巡撫採進本

明吳仁度撰仁度字君重金谿人萬歷己丑進士官至工部侍郎明史儒林傳附載其父悌傳末其

集初刻於萬歷乙卯此本爲其六世從孫廷相所重編凡中書考功奏疏一卷撫晉奏議六卷撫晉全草三卷各註原本卷次於下又遺稟二卷各註新增字撫州府志稱其爲文不拘訓詁每脫稟卽棄去故無存者此二卷蓋廷相撫拾殘剩附於奏議公牘之後者也仁度初除中書舍人時嘗爭三王竝封之事其疏今載第一卷中撫晉時亦頗有擘畫遺稟則隨筆寫意而已

葉玉成全集四卷附錄二卷

浙江巡撫採進本

別集類存日六

明葉永盛撰永盛字子沐涇縣人萬歷己丑進士官至太僕寺少卿事蹟具明史本傳是集雜文一卷奏疏三卷為其裔孫沃若等所刊當萬歷中葉稅瑞用事弊政百出永盛以御史巡視浙江鹽政適姦人奏請增課稅瑞持之甚急永盛獨抗疏糾論屢折不回卒以無擾今諸疏及措置浙鹽始末一篇具在集中明史本傳亦採錄其略其他序啟祭文之類僅二十餘首則其子孫姑存手澤而已末附名宦錄一卷皆萬歷中請祀呈詳批荅案牘

及去思德政碑又鄉會中式錄一卷則永盛倡建崇文書院疏請許商人占籍應試因紀歷科中式姓氏以誌不忘所載至國朝康熙中蓋後人所續入也是亦足見浙人之不忘永盛矣

李湘洲集十卷補遺一卷

湖北巡撫採進本

明李騰芳撰騰芳字子實湘潭人萬歷壬辰進士官至禮部尚書其學宗王守仁故集中第二卷有陽明集鈔序反覆幾二千言發明良知之旨至以

事功節義與辭章養生均爲正道之障又有金剛經集註序金剛經注采序蓮池自知錄序皆提唱二氏之說亦頗尊崇李贄稱爲卓吾老子蓋明季士大夫所見大抵如斯不但騰芳一人也然騰芳畱心經世喜談兵事其策倭安攘至計疏及進戚繼光兵略諸疏猶非徒以狂禪縱論者矣集無序跋不知何人所編據卷首家傳稱其生平著作燬於喇寇此本蓋由掇拾而成故十卷中多有錄無書者別以補遺一卷刻於末云

關中集四卷

兩江總督採進本

明余懋衡撰懋衡字持國婺源人萬歷壬辰進士官至南京吏部尚書事蹟具明史本傳是集乃其巡按陝西時所作凡論說雜文共七十八篇所評古今人物皆蹈襲陳言至謂封建井田爲可行尤屬拘迂之見自序稱萬歷丁未杜門請告四閱月而成帙中有自嗤一篇云窮年焚膏不得一二偶得一二索紙書之紙墨未乾已規規失其大略可觀矣

綠滋館稟九卷

江蘇巡撫採進本

明吳士奇撰士奇有史裁已著錄是集文八卷詩一卷其文雖不能步趨歸唐而文從字順尚不蹈王李贗古之習惟韻語牽率頗甚朱彝尊靜志居詩話稱其長於史學詩特餘藝其殆然歟

靈護閣集八卷

浙江孫仰曾家藏本

明湯兆京撰兆京字伯閔宜興人萬歷壬辰進士官至監察御史事蹟具明史本傳兆京廉正鯁直佐孫丕揚掌察典尤力持公議為羣小所嫉然律

身嚴正雖屢遭排擊卒不能以一言污之其制行甚高詩文非所屬意亦皆不入格

西樓集十八卷

福建巡撫採進本

明鄧原岳撰原岳字汝高閩縣人萬歷壬辰進士官至湖廣按察司副使明史文苑傳附載鄭善夫傳中是集詩十卷文八卷卷首謝肇淛所作小傳謂原岳為詩初學鄭善夫已又學七子既而一意摹古要以唐人為宗末年益復宏肆今閱其詩功候頗為不淺惟未免有摹擬之痕也

直隸總督
採進本

明董復亨撰復亨字元仲元城人萬歷壬辰進士官至吏部郎中外轉布政司參政未上而卒是集凡文十七卷詩五卷復亨沒後其同里張銓序而刻之其文喜剽掇詞藻如廣武郡理胡懷南治最承恩序曰閒請所謂舉業讀之其沈詞怫悅如游魚銜鉤而出重淵之深其浮藻聯翩若翰鳥嬰繳而墜層雲之峻其涵緜邈而吐滂沛又若風飛焱豎若芳蕤馥而青條森也割裂文賦以入散體古

今有是格律耶詩尤非所擅長矣

兩江總督
採進本

明袁宏道撰宏道有觴政已著錄其詩文所謂公安派也蓋明自三楊倡臺閣之體遞相摹仿日就庸膚李夢陽何景明起而變之李攀龍王世貞繼而和之前後七子遂以仿漢摹唐轉移一代之風氣迨其末流漸成偽體塗澤字句鉤棘篇章萬喙一音陳因生厭於是公安三袁又乘其弊而排抵之三袁者一庶子宗道一吏部郎中中道一即宏

道也其詩文變板重為輕巧變粉飾為本色致天下耳目於一新又復靡然而從之然七子猶根於學問三袁則惟恃聰明學七子者不過贗古學三袁者乃至矜其小慧破律而壞度名為救七子之弊而弊又甚焉觀於是集亦足見文體遷流之故矣

游燕集二卷小草齋橐一卷

安徽巡撫採進本

明謝肇淛撰肇淛有史籀已著錄游燕集二卷為萬歷己丑肇淛公車北上時所作小草齋橐一卷

則己丑還山後至辛卯復上公車時所作案黃虞稷千頃堂書目肇淛有小草齋詩集三十卷文集二十八卷又續集二卷此二集乃集中之二種非完帙也

芙蓉館集二卷

浙江孫仰曾家藏本

明楊一葵撰一葵字翹卿漳浦人萬歷壬辰進士官至雲南布政司是集詩一卷文一卷詩格頗清文則多應酬之作首有蔣孟育序稱一葵先有豫章集及畫暗編行世今二書未見傳本其自序二

篇則在此集中云

旭山集十六卷

浙江孫仰曾家藏本

明金忠士撰忠士字元卿宿松人萬歷壬辰進士官至右僉都御史巡撫延綏是集詩止一卷餘皆雜文忠士歷任邊疆所至皆有所建立其施設頗見於集中第六卷內榆林河套諸考條列顛末述盛衰之勢備撫治之方多可與史事相參核蓋皆得之閱歷之實故其言確鑿可據固不必其文詞之工也

石伯成詩彙四卷

直隸總督採進本

明石九奏撰九奏字伯成冀州人萬歷壬辰進士官至兵備副使進右參政其詩多學才調集而風格未成朱彝尊明詩綜選入春郊一絕閱其全彙實無有過之者也

水明樓集十四卷

福建巡撫採進本

明陳薦夫撰薦夫名藻以字行更字幼儒閩縣人萬歷甲午舉人朱彝尊明詩綜作名邦藻以集中行狀考之明詩綜誤衍一邦字也是集詩九卷詩

餘一卷賦及雜文四卷考徐燧晉安風雅自薦夫
之會祖燧祖達父輔之與其兄价夫皆以詩名其
家學淵源固有所自曹學佺為之序稱其質癯而
腹腴語險而法中雖目不涉詩書跡不交山水能
使下帷之夫駭其博雅好遊之士推其韻致則過
其實矣

折腰漫草八卷

浙江孫仰曾家藏本

明華善繼撰善繼字孟達無錫人官至永昌府通
判善繼與弟善述竝有才名朱彝尊謂其詩不及

善述然王世貞序列四十子詩顧取善繼而善述
不與焉殆以善述詩體格不純操縱任意不若善
繼之愜適歟是集刻於萬曆甲午蓋善繼所自編
也

奉使橐

無卷數 兩江總督採進本

明朱之蕃撰之蕃字元介荏平人南京錦衣衛籍
萬曆乙未進士第一官至吏部右侍郎之蕃以萬
曆乙巳冬被命使朝鮮丙午春仲出都夏杪入關
與館伴周旋有倡必和錄為二大冊第一冊為奉

使朝鮮稟前詩後雜著之蕃作也第二冊為東方和音朝鮮國議政府左贊成柳根等詩也未有乙未制策一道及東閣倡和詩數首為讀卷官沈演等作蓋後人所附入案千頃堂書目載之蕃使朝鮮稟四卷紀勝詩一卷南還雜著一卷廷試策一卷落花詩一卷與此大同小異蓋所見者又一別本云

清暉館集二卷

兩江總督採進本

明謝廷諒撰廷諒有千金堤志已著錄是集上卷

為詩下卷為文前有萬歷戊子陳文燭序稱其學問日富變化無窮與胡應麟竝稱今觀其所作亦頗工麗自喜而邊幅太狹猶在少室山房集下也

薄遊草十五卷

浙江巡撫採進本

明謝廷諒撰此集皆其宦遊時所作故以薄遊為名凡詩六卷文九卷明史藝文志載廷諒薄遊草二十四卷此止十五卷殆非完本也

自愉堂集十卷

浙江巡撫採進本

明來儼然撰儼然字望之三原人萬歷乙未進士

官兵部主事是集凡文四卷詩六卷乃其子復臨所刊酬應尺牘居其大半他作亦多冗厲之音朱彝尊明詩綜不登一字殆病其麤歟

駱台晉文集八卷

福建巡撫採進本

明駱日升撰日升字台晉泉州人萬歷乙未進士官至四川布政司參政殉奢崇明之難贈光祿寺卿日升以節義顯而文章不免漸染時趨末附解經數則及學約規條則其為廣西提學僉事時以示諸生者也

尙友堂集二卷忠諫遺藁一卷

福建巡撫採進本

明林秉漢撰秉漢字伯昭一字聚五長泰人萬歷乙未進士官至浙江道監察御史巡按廣東卒贈太僕寺卿諡文端事蹟具明史本傳據張懋建所作秉漢傳稱所著有館藁疏草尙友堂藁若鳩草長山集此總名尙友堂集蓋高密單德謨為之選定哀為一編惟其忠諫遺藁別為一卷皆秦粵時奏疏也

元居集九卷附哀榮錄一卷

福建巡撫採進本

元居集九卷附哀榮錄一卷

別集類存目六

辛

明李春熙撰春熙字皞如號泰階建甯人萬歷戊戌進士官至南京戶部郎中是集詩五卷文四卷後附哀榮錄一卷詩分姑熟草彭城草旅言粵游草燕游草白門草鄴中草七集文則奏疏及征交阯時文移公牘條議悉編入之第七卷中論代藩爭立一疏尤其大節也集為崇禎辛巳其子嗣元所編此本又其裔孫芳所重雕據嗣元序當有十二卷今止十卷然首尾完具又似非闕佚疑芳又有所合併非盡原帙矣

蟄菴日錄四卷

兵部侍郎紀昀家藏本

明顧起元撰起元有說略已著錄是集乃其天啟壬戌癸亥兩年所作詩文曰蟄菴者自序謂足瘍至冬輒發每寒月即自繭一室塞向瑾戶嘗自笑以為似昆蟲之入蟄因以名其菴云

樗全集七卷附錄一卷

福建巡撫探進本

明王畿撰畿字翼邑號慕蓼晉江人萬歷戊戌進士官至浙江布政使與講學之王畿同名非一人也是集詩文共七卷末附家譜勸戒二十則為一

卷畿立身居官矯矯自勵故所為詩文皆質樸類其為人卷首序為施邦曜所作畿視學浙江時拔邦曜第一邦曜貧不能婚畿為備聘拜鴈於官署邦曜即於是秋登第後殉節為完人其識鑒為世所推服云

大旭山房集一卷

江西巡撫探進本

明鄧漢撰漢字遠遊自號簫曲山人建昌人萬歷戊戌進士官至僉都御史巡撫順天忤魏忠賢謫戍貴州崇禎初放還卒是集皆散體之文案明版

唐文粹之首有漢序曰文家法秦漢非不善也然摹擬工則蹊徑太露構撰富則窠臼轉多至近日膚淺之法畏難好易眉山盛而昌黎河東二氏詘云云頗中明季古文兩派之病其自作則未能凌跨一時也千頃堂書目有漢畱夷館集四卷南中集四卷紅帛集四卷不載此集殆偶未見歟

百花洲集二卷

江蘇巡撫探進本

明鄧雲霄撰雲霄字元度東莞人萬歷戊戌進士官至廣西布政使參政是集乃其官長洲時所作

故以百花洲為名其詩近體居十之八九

解弢集一卷

兩淮鹽政
探進本

明鄧雲霄撰雲霄作冷邸小言論詩以妙悟為宗以自然為用故茲集所載多仿王孟之音而醞釀深厚則未及古人昔嚴羽作滄浪詩話標舉盛唐而所作乃惟存浮響雲霄所論所作蓋均似之矣

一齋詩集十三卷

福建巡撫
探進本

明陳第撰第有伏羲圖贊已著錄是集凡粵草一卷詩文各半萬歷戊戌至庚子游廣東時作也寄

心集六卷焦竑為之選定皆四言五言古詩多涉論宗故別為一集五岳游草六卷大抵紀遊之詠而雜詩亦散見其中不盡為山水作也據原序尙有一集名塞曲乃官薊州遊擊時作此集不載蓋佚之矣第韻書妙有神解遂為言古音者之開山詩則信筆而成非所擅長然第亦不必以此擅長也

緱山集二十七卷

浙江汪汝
璫家藏本

明王衡撰衡有紀遊橐已著錄萬歷戊子衡舉順

天鄉試第一時其父錫爵在政府為高桂饒伸所劾遂不復會試錫爵罷相後始登萬曆辛丑進士第二入翰林旋即歸養得以其閒肆力於古學與王世貞雖同里閤而不蹈其蹊徑然頗染陳繼儒之俗格明史隱逸傳稱錫爵招繼儒與衡讀書支硎山其所由來者漸矣

許鍾斗集五卷

浙江孫仰曾家藏本

明許獬撰獬有八經類集已著錄是集大抵應俗之作館課又居其強半蓋明自正嘉以後甲科愈

重儒者率殫心制義而不復用意於古文詞洎登第宦成精華已竭乃出餘力以為之故根柢不深去古日遠况獬之制義論者已有異議則漫為古調其所造可知矣

劉練江集七卷附錄一卷

編修程晉芳家藏本

明劉永澄撰永澄字靜之寶應人萬曆辛丑進士官國子監學正乞歸省親起兵部職方司主事未上卒事蹟具明史本傳是集文六卷詩一卷附錄一卷乃永澄沒後其友劉宗周等共為哀輯其文

章平正通達而大致謹嚴篇首程朱藥言序尤為深切蓋永澄雖與東林諸人遊而操履篤實故詞采不足而持論不詭於正無門戶標榜之習云

葉子詩言志十二卷 浙江巡撫採進本

明葉秉敬撰秉敬有字孿已著錄是編首載述職吟心五卷乃大計入覲時作次載賦類一卷吟類一卷乃督學河南時作次迺編五卷則雜錄對聯偶語自序稱取虞書詩言志論語志於學二語以為作詩要領故以此名其集秉敬淹貫羣書著

述甚富而所作韻語乃過於質樸殆所謂詩有別才耶

元凱集五卷 福建巡撫採進本

明陳勳撰勳字元凱閩縣人萬歷辛丑進士官至戶部郎中福建通志載元凱集四十卷此本僅文三卷詩二卷然首尾完足初非有關集為其同年呂純如所刻或經純如選定耶勳為鄭善夫外曾孫其瓣香有自故雖無傑構而尚有典型

白榆集二十卷 江蘇巡撫採進本

金定四庫全書總目卷一百七十九
明屠隆撰隆有篇海類編已著錄是集詩八卷文
十二卷隆爲人放誕風流文章亦才士之綺語陳
子龍明詩選謂其詩如衝繁驛舍陳列壺觴頃刻
辦就而少堪下箸文尤語多藻繪而漫無持擇蓋
沿王李之塗飾而又兼涉三袁之纖佻也

由拳集二十三卷

內府藏本

明屠隆撰是集凡賦一卷古今體詩十卷雜文十
二卷時隆方知青浦縣故以由拳爲名

玉茗堂集二十九卷

兩江總督探進本

明湯顯祖撰顯祖有五侯鯖字海已著錄顯祖於
王世貞爲後進世貞與李攀龍持上追秦漢之說
奔走天下歸有光獨詆爲庸妄顯祖亦毅然不附
至塗乙其四部稟使世貞見之然有光才不逮世
貞而學問深密過之顯祖則才與學皆不逮而議
論識見則較世貞爲篤實故排王李者亦稱焉是
集凡詩十三卷文十卷尺牘六卷前有南豐朱廷
誨序稱其解陰符五賊禽制之法序春秋輯略發
仁孝動天下之旨記小辨明復小乾大之一致非

無根據之學者然終非有光匹也

適適齋鑑鬚集七卷

福建巡撫
採進本

明陳玉輝撰玉輝字達卿號荆碧惠安人萬曆辛丑進士官至南京監察御史所著有客客軒散言皇芩草公餘課兒草岳陽草諸種此集乃其一也凡語錄一卷文五卷詩一卷其子龍巖題識謂全集未刻已經淪軼故所存者止此玉輝從鄒元標講學其文章根柢尚為醇正詩則隨意抒寫不求甚工又多佚脫如白門紀懷七言律詩稱依上下

平韻次第當有三十首今僅存二十首則其殘闕可知已

薛文介公文集四卷

江蘇巡撫
採進本

明薛三省撰三省字魯叔定海人萬曆辛丑進士官至南京禮部尚書卒諡文介是編有文無詩奏疏幾居其半奏疏中辭謝者又居其半惟請福王之國一疏最為激切其官檢討時所上也

叢桂軒集二卷

浙江朱彝尊家
曝書亭藏本

明吳大經撰大經字元常常熟人是集大經所自

編前有萬歷癸卯自序稱謝去帖括之學蓋山林之士也其詩酷摹劔南圓熟有餘深微不足魏浣初序乃謂袁宏道推明代詩人以徐渭為第一而大經配之殆非篤論矣

蟋蟀軒草

無卷數 山東巡撫採進本

明劉士驥撰士驥字允良禹城人萬歷甲辰進士官翰林院編修士驥於李攀龍為鄉人而不循其門徑是集前有李若訥序稱允良自言少年濡首李王諸家顧李王生今日宜另繡其腸其不肯從

風而靡不為無見然集中詩文乃作嘽緩之音是則楚既失之齊亦未為得也

四然齋集十卷

兵部侍郎紀昀家藏本

明黃體元撰體元字長卿穀城人萬歷甲辰進士官至山東按察司副使是集體元所自編取中和集身心世事謂之四緣委身寂然委心洞然委世混然委事自然之語故以四然名齋因以名集蓋明季士大夫耽二氏者十之九也

樊致虛詩集四卷

兩淮鹽政採進本

明樊良樞撰良樞字尙植一號致虛進賢人萬歷甲辰進士官至浙江提學副使是編凡匡山社集一卷二山草三卷皆以所居地名之匡山取居近匡廬之義二山則官淮南時取淮南大小山之義也二山草中又附以其叔儻弟尙燦良楹子重鵬等次和之作大抵多規撫七子聲調

峽雲閣存草七卷後存草七卷

福建巡撫採進本

明魏濬撰濬有易義古象通已著錄其詩草本四十卷是集僅刪取十四卷故謂之存草存草為未

第時之詩後存草為既第後之詩其後存草內又分為初燕詩農詩桂詩東詩東後詩家詩衡詩各一卷蓋皆隨宦蹟所及各舉地名之一字以為標目其詩不出贗古之習蓋萬歷以後之詩不公安竟陵則仍太倉歷下耳

隆德堂詩文彙二卷

直隸總督採進本

明魏純粹撰純粹字仲乾柏鄉人萬歷甲辰進士官至監察御史是集詩文各一卷多其官永城知縣時作末附為御史時請假省親疏一篇

黃言六卷

兩江總督採進本

明余懋孳撰懋孳字舜仲婺源人萬歷甲辰進士官至給事中此集乃懋孳所自編凡文五卷詩一卷其曰黃言者蓋取黃稗之意自謂學而無當於道者稗學也言而無當於道者黃言也又謂命題屬草聊供酬應今觀其文如門牆桃李冊序刻聯捷彙引細草流芳冊小引題龍山課藝等篇皆不免俗體蓋疎於芟汰之過也

皆春園集四卷

兩淮鹽政採進本

明陳完撰完字名甫號海沙南通州人萬歷丙午舉人是集為完所自編其詩多恬適敷暢而不見性情較黃省曾五岳山人集格調相似而才力尙不能逮也

達觀樓集二十四卷

江西巡撫採進本

明鄒維璉撰維璉字德輝號匪石新昌人萬歷丁未進士官吏部郎中時以疏劾魏忠賢謫戍貴州崇禎初召為南京太僕寺卿洊擢右僉都御史巡撫福建勦海寇有功終為溫體仁所忌罷崇禎八

年起為兵部右侍郎未上而卒事蹟具明史本傳
是編詩集凡六卷曰願學編蓋早年初學之作曰
宦遊草作於司理延平時曰友白草作於貴州謫
戍時蓋擬太白之流夜郎也曰友歐草作於起官
太僕時蓋南太僕署在滁州多歐陽修遺迹也曰
導噫草中多感慨時事之什蓋作於撫閩時也文
集凡十八卷首冠以四書五經疑義中如信豐坊
偽石經信愈庭椿改周禮信蔡沈三代改時不改
月諸說皆未為卓識蓋其氣節才略足以自傳學

問則未深造也據編首自序尙有大夢橐又夢橐
自警編諸目此本皆無之或維璉自刪或後來所
佚均不可考矣

掃餘之餘三卷附歸涂閒紀一卷

浙江巡撫
採進本

明劉錫元撰錫元字玉受長洲人萬歷丁未進士
官至貴州提學僉事是集第一卷庚夏七發記其
庚申夏病疫事二卷為序記簡牘雜文三卷為雜
文乃其官祠部時考驗眾僧雜作附歸涂閒紀一
卷則記其官黔中苗亂事大抵多作佛家偈語閒

涉併體

湛園集十卷

山西巡撫
採進本

明程正已撰正已字道先號澄源長治人萬歷丁未進士官至僉都御史巡撫保定以忤奄黨削職後終於兵部侍郎是集為其子之璿所編凡詩五卷文五卷大抵惟取自適無意求工

欽定四庫全書總目卷一百七十九

番禺陳起榮初校
南海譚懋安覆校

系